

太上洞玄靈寶誡業本行上品妙經

字八

太上洞玄靈寶誡業本行上品妙經 字八

道言昔我於洞明丹陵天中玉臺受元一金
真法輪誡業本行因緣上品與我無上高上
洞明大法王之號常鎮玉清高上大園都開
飛天法輪上本誡業之功開度萬有生死之
場天人罪福諸源運載三乘登步上清十轉
真人光明幽夜弘廣十方迴十惡之根使從
十善而行咸得徑生無量大園天堂有能從
者克獲道真

道言我常隨運降下十方飛天元生大福堂

洞明寶庭開是法輪十善法門咸使十惡從
法而遷從是法輪轉昇上天悉得妙通廣明
本行宿業因緣吾觀天地希有其人自非上
德何能奉焉

道言誠業至行惟上德弘遠金真本行長存

字八

之源善當正念魔無敢言斷諸惑亂諸天朝
真彼諸生惡爾勿從之斯罪根深會當入吾
法輪彼之起禍莫與之爭墮身三惡望反甚
艱障道者無明嫉人者自刑謗人者始從畜
生道中出也樂淫色者由之先業六畜根未

斷矣貪狠者自傷貪味者吞毒斯酷之本善
當遠之乎

道言元一天尊當說是誠業本行之時天尊
以手指點十方虛空之中命召十方飛天帝
王至真皇人飛天無極神王妙行真人高上

玉皇無極大聖身神三十六天上帝諸天至
真九宮真人五老之上真天真地仙無極世界
神仙玉女無量大聖衆三界靈官三元正真
執法官屬無鞅之衆一時同駕乘空而來上
詣玉都天光四朗紫蓋迴天威靈濟濟流激

十方敷明諸天燒香散華飛玄步虛三帀復
位稽首朝真同登金真法輪諸場仰觀法音
莫不歡悅咸同稱善

道言無上金真誠業普隆萬圍誠行之本萬
無其人天理妙旨上真行焉但十方天人空

字八

二

生禍府造立萬端通惡所釋訣在乎心開建
道場普轉法輪光明六道開度天人孤魂苦
爽同登福天終身歡樂劫劫長存自斯以往
皆由法輪上品之恩爾時諸天大聖無鞅之
衆同時稱善左迴三帀叉手作禮伏受誠言

天尊告諸大聖衆曰吾開金真法輪運化諸
因有諸難得惟形是難夫至德身亦爲一國
之域利用招禍心之能造故通制包藏之境
由善惡之門惟有至人知覺得道無爲若能
從之諦受勿忘

天尊告諸大聖衆曰元氣輕微運導不淳本
業易造動至亡身五心所起十惡生焉長淪
毒刃莫能覺乎自受痛哉吾爲十方天人轉
度生死之源十善備立悟其來生一切因緣
伏承誠業即得道真

天尊告道君曰吾開法輪上品金真誠業十
善正本萬行之門爾若從之咸當伏聽於是
道君稽手作禮伏受誠文

誠曰一品正觀衆妙本皆得神通業二品正
聽玄妙音神通知十方三品正知香光入神

字八

三

通靈氣存四品正音闢妙門神通利益無量
果五品正存法誠行神通道真降六品正念
衆生苦神通光明報七品正想無二惑神通
正道界八品正行大慈業神通無上真九品
正定形影不動衆行神通妙覺十品正具形

神剛明執正神通玄妙

天尊言金真上品十正神通誠業萬行之首
執正十方無量通微之本吾開法輪故演其
文以度劫災生死諸滯咸使從茲而轉登乎
長存道真成就終身不見十惡之門

天尊言金真本行十品上善之功一品斷五
色貪利緣正見不邪視二品斷五音六塵之
聲內外無邪聽之聞三品斷六觸之因邪氣
不入四品斷虛談假論邪言綺語不前五品
斷衆禍之害衆邪不侵六品斷想五陰邪惡

不干七品斷行非造作邪災不生八品斷諸
惑亂衆邪不犯於物九品斷無端之行邪疾
自消十品斷十惡之業常當心取法輪萬魔
邪神自却無敢當矣

天尊告道君曰此是無上金真本行上品澄

真白鍊空寂通稱上業能如是者金真可期
矣吾觀天人萬無其一自非至人莫能從焉
天尊言金真觀行十品常能如是者萬善備
立一品見五色不貪者淫風不行二品聞五
音不聽者魔風自除三品聞衆氣馨香不樂

者六府不傷邪風自退四品見五味不貪甘
進者衆塵不汙身五品聞衆樂不觀者即外
塵惡風不驚六品守一無諸假想者終身不
染邪氣不生七品舉動乘誠本行者諸塵自
消形色光淨八品見寶貨非橫不取者萬善

字八

四

來臻終身安存九品和性無嫉無妬見事不
觸者萬福降真靈魔禮焉十品安身閑想慈
念一切宿命者十方護身高上奏功克獲上
真

天善守告道君曰吾開金真上品法輪誠業本

行之由十方天人若能如是者即與十聖齊
功得入長存法界得道自然者也終身光明
億劫同慶福流萬代常與法輪不絕矣

天尊言吾開法輪十聖之場一品轉通立能
心知一方中輕重事位次別覺聖二品轉通
得知世界有無吉凶事位次得覺聖三品轉
通能達知罪福一切宿命來往生處果報由
趣位次正覺聖四品轉通能以心往見衆生
心逆照未然禍福陰中事位次通覺聖五品
轉通普知十方無極世界一切緣運由趣休

否事位次大覺聖六品轉通通通玄觀知悉達
十方界域衆聖處所只如指掌分形散影虛
空無礙位次妙覺聖七品轉通普知天地運
趣機數有無遠近悉無障礙位次洞覺聖八
品轉通身居立忘形如日中景一切觀徹位

字八

五

次觀覺聖九品轉通普能開明放身中寶光
普照十方一切普見上下無不洞達位次普
明大覺聖十品轉通普觀普察普明普照無
幽無冥洞知天地光顯十方湛然長存位次
洞明大覺至真大聖者也斯行之業皆從法

輪而轉八十通大聖其德高妙自非法輪之
功莫能轉焉十聖果緣乃從無量恒沙劫來
施功布德備滿天地弘廣十方致得轉位入
十聖之功妙通上品夫十方天人能如是者
道真成焉

天尊即勅无上高上洞明大法王曰可誦无
上金真法輪誠業本行妙通轉位玉章无上
高上洞明大法王即起作禮朝真左廻三帀
誦法輪誠業玉章頌曰

湛寂法誠功 觀行極大乘 金真衆妙好

正位諸天朝 法輪无上德 皆轉无上真
神通六度外 飛天多福人 開度大梵仙
十品悉成真 巍巍自然道 逍遙大光天
念得恒沙劫 歷觀一切緣 自无上品業
何由拔苦根

法輪本行上品玉章頌曰
通觀十本源 朗朗凝成真 斷去十惡場
品行入法輪 內外香光起 倏忽登金真
一昇雲明宮 威光煥諸天 皆從本行起

稽首朝天尊

法輪觀行玉章頌曰

仰觀金真行 絕景無諸塵

形姿七寶相

雲明照諸天 飄飄大乘境

飛天轉法輪

萬福同一慶 轉度十苦人

身登玉池上

沐浴鍊成仙 十方無孤魂

普開恒沙恩

字八

六

妙通至真德 束首天寶前

法輪轉通十聖洞明玉章頌曰

无上開妙化 運功皆齊最

法輪十位場

大羅諸法門 通稱大光品

十聖並高真

妙德轉十通 湛然十飛天

安和樂未央

普明昔往緣

命合長存壽

洞覺應自然

眇眇難爲雙

六時朝天尊

天尊告道君曰是四篇玉章此乃是无上金

真誠業之首法輪轉通妙覺本行之源其文

封在无上玉都流明宮中金真元君保賞金

靈童子八千四百真常誦其章聲響十方嘯

朗諸天羣真义手稱善至真朝焉高上即開

法輪上品轉度十方諸得道大聖衆以登无

上金真者矣夫是天人有知其章受持修齋

執誠禮誦靈文者靈音即上徹十方九天稱

慶高上讚嘆即開法輪之品轉度其人得登
无上至真諸場其道高妙自非大光開運十
方莫能聞焉

天尊言吾開法輪十善諸場一品慈孝順物
萬行同心二品愛念一切衆生皆如我身三

字八

七

品信向經誠罪福所由之源四品能捨寶貨
布施天下無量諸人窮厄者五品能廣建功
德營建道場福因萬代六品能守善而死忍
辱不殺不盜七品能救濟一切厄急無量衆
生性命捨放無窮皆得存其本命八品能供

養三寶晨夕禮誦執戒持齋恒無怠倦九品
常能開化天人愛念國主享祚長存恒以財
物潤益貧窮孤老無量苦人常無貪惜十品
行常使然不進不退一心行善夫天人能如
是者即可謂十善之功萬行同慶之本也此
皆是十方飛天無極至真皇人无上誠業本
行之源天人能從之者即以十方飛天無極
至真齊功矣

无上飛天法輪轉十善妙通玉章頌曰

流明大範品

開道無量功

轉度十善行

梵景飛天堂

逍遙七寶宮

仰觀法輪王

靈顏絕妙好

常降十道場

齊駕三寶乘

運載諸天人

倏忽雲光發

衆相並金容

皆從斯福起

受位高上真

遊憩天寶臺

慶此劫數迴

三帀朝道主

稽首禮天尊

天尊告道君曰是玉章一篇乃是十方无上

金光童子各十真鎮於飛天法輪天寶宮中

保賞靈文常隨法輪十善品轉法輪誦其章

以度十方諸天持行無量善人策駕三乘寶

乘嘯誦其音羣真讚和震響十方諸天設禮

莫不恭心開津三界三真奉迎香華伎樂營
衛善人直登法輪諸場矣

天尊告道君曰吾開法輪十善上品咸使十
方諸天人皆去十惡諸場其有如是行十惡
者爾莫從之行其中唱言快樂者爾宜避之

字八

八

言其欲來害者爾但當一心念誠業存真而
受之殺其理自不能有害我身此即轉成无
上至真者乎其人自當殺報也其有賢聖出
者爾當尋之一覩神顏萬劫常得其力矣夫
理甚微故以上天十福堂以對下十惡場者

也

天尊言法輪開度十惡諸場一品不行慈孝
之道尊卑上下失禮恒無和順之心相向二
品不行愛念衆生常懷凶勃三品不行信向
心快情所爲作諸惡業反逆君王四品不行
愛善不捨不施心常破傷他物自言得快無
諸慈悲五品不行建功德心惟建非禍事爲
樂六品行不能忍辱心常欺妄於他萬端無
信七品不行救濟厄急心常懷執著性常願
人墮惡道八品不行恭敬經誠心常謗毀天

真以入邪論害生祭祀九品不行利益心常
以財利割剔貧窮孤老自貪潤己身十品身
行常殺害無量衆生淫欲無度萬惡備立進
退疑惑行常使然者可謂十惡矣斯行皆非
天非地止由於心夫上德至人唯以十善爲

字八

九

功常以己心爲十方飛天福堂逕往法輪爲
因緣執持誠業尋本行微取果報上真之德
是以不經十苦不入八難不見煩惱不履三
塗也夫下士諸人唯以己心常爲執殺之官
逕尋地獄循環諸報背十善向十惡行十苦

自以身投八難往取煩惱之根形履三塗之
門日有沉淪億劫長罹塗炭去福遠矣吾開
法輪普度諸人矣

无上飛天法輪轉十惡入妙通上品玉章頌
曰

鬱秀玉清	太无自然	陰影十方	開津法輪
拔度八難	轉諸福天	流景冠帶	解滯胞根
積尸受鍊	滅惡通真	玉皇命召	十善並原
諸天稱慶	五老侍晨	帝君執符	齊送道前
飛天大圍	無量度人	劫劫承化	運載三乘

法王品位 无上至真 三元除惡 九夜光明

束身天寶 形登長存 妙德高上 洞明金真

天尊告道君曰是玉章鎮於飛天法輪右宮

十方玉童玉女各十真保賞靈文常隨法輪

上品轉十惡諸場遷度天人生死苦魂咸使

劫劫運化常與法輪有緣天人知其章修

齋行香禮誦者法王降真道成不久矣

天尊告道君曰吾開法輪以轉十惡諸場上

品之福其功無量靜心絕想此為上德聞樂

不聞浮華美色此是十惡之根形非長有財

不長存道真无上故開法輪世界有欲尋真
棄俗因緣保固元氣凝素自然魔來忤者慎
口勿言生惡起惑終入法輪障道者苦後身
如然

天尊言法輪開度十苦諸場一品履刀山苦

字八

十

二品上劍樹苦三品入鑊湯苦四品抱銅柱
苦五品卧鐵牀苦六品火車載入寒池苦七
品拘頭拔舌苦八品吞火食炭苦九品三官
鎖械徒役金槌鐵杖考掠苦十品生身受鎖
械煩惱形殺苦如是十方有斯十苦皆由先

身集因所得吾觀諸苦塗炭難言故開法輪
普度諸天十方歡樂原赦之焉六道光明法
橋路通一切同慶道真降矣

无上飛天法輪轉度十苦品玉章頌曰

歷觀十方 無量罪根 流曳十苦 焦體爛壞

大小相牽 彌劫塗炭 毒刃傷身 沉沒九夜

望反甚難 方思十善 念是因緣 櫻承痛切

風刀往還 吞陰食毒 魂神無閑 仰視无上

飛天法輪 開度上品 轉諸昇遷 策身玉庭

妙通十天 無極世界 洞識諸緣 修行誠業

稽首道前

天尊告道君曰是玉章鎮於飛天法輪中宮
十方丹靈童子各十真保賞靈文常隨法輪
上品轉度十苦諸場開度天人生死咸得法
緣天人有誦其章上聞九天法王命真來度
之焉

字八

十一

天尊告道君曰吾開法輪以轉八難諸場上
品之功無量法門夫人心淨十善降焉生貪
業惡物心不淳彼有懷惡爾當善之三元執
法近在身中陰私皆結以上奏諸天考官速

至坐徵疾傷試行上本善當從之無聞倒見
故知無緣正具形神晨夕恭心道真下降度
爾福天

天尊言法輪開度八難諸場一品受身出邊
夷難二品受身為奴婢下使難三品受身出
為貧窮孤陋人難四品受身六疾人難五品
受身愚癡六根不具足難六品受身鎖械煩
惱徒役難七品受身出不孝不慈生亡難八
品受身出於無道國中難者也夫是八難者
皆由先身集行所得從十苦中出方生八難

中但上德至人常以十善以擬將來往生十方無量福堂也夫無明倒見者恒以十惡為本故生亡十善一生一死億劫苦惱恒出八難受報吾開法輪以度斯人矣

无上飛天法輪轉八難上品玉章頌曰

仰觀八門

輪轉罪田

受諸苦惱

形魂不閑

先無誠業

終身八難

無量罪門

一生一死

十惡往還

於是冥冥

受諸沉淪

飛天大赦

普轉法輪

高上八觀

洞開玉城

七寶宮臺

乘運相迎

雲明煥照

十方大庭

金容絕妙

雙光自生 榮龍駕鳳 遊憇玉京 寶林羅列

身中光明 三羅自解 八難齊并

天尊告道君曰是玉章鎮於飛天法輪右玄
臺上十方靈光玉童玉女各十真保賞靈文
常隨法輪上品誦其章轉度八難諸場以暢

字八

十二

天人生死之魂咸得光明普見法緣夫天人
有知其章拔度存亡滯苦齋而誦之者諸天
降下即度兆生死命籍遷上長存之福堂矣
天尊告道君曰吾開法輪以轉三惡道之場
上品之福無量羣生悉令得轉度十方福堂

運化生天斯惡深重皆由先身害生萬物無
量衆生之命致生彼道以報昔緣一生一死
業對所因今轉諸身普入善根自覺往生一
切因緣生死蒙惠莫不歡焉

天尊言法輪開度三惡道諸場一品地獄幽
閉塗炭二品餓鬼自相食噉煩惱之苦三品
畜生同類怨對相擊之毒夫如斯等衆生若
反化卽生三惡中一品生蟲中二品生鳥中
三品生獸中者矣先身行業元逆之本其罪
負重致招斯惡彌劫聚集應得是報吾開上

品無量法輪普拔斯惡以還福門

无上飛天法輪轉三惡道上品玉章頌曰

歷觀十方中 無極世界人 豪貴不畏罪

快意害衆生 興伐逆國主 不顧後身攖

罪滿九河内 形履刀山庭 舉手循劍樹

字八

十三

流血落如星 坐待鑊湯煮 鐵錐刺身形

迴身入餓鬼 只聞悲哭聲 仰頭看鐵網

足立流火庭 六畜相割剔 以報昔往生

但見十福天 乘景負圓明 逍遙三界外

方念三寶經 法王萬善行 普開無量功

轉度三惡道

受鍊十天仙

身生五色光

妙見諸惡緣

一超三便去

閑居十飛天

天身告道君曰是玉章鎮於飛天法輪上品

玉城中十方法輪玉童玉女各十真保賞靈

文常隨高上上品法輪誦其章轉度三惡苦

道諸場以鍊滯尸苦骸咸得光鮮普登十天

福望天人有知其章命過之日齋而誦之魂

爽即不過三惡逕昇十方品入法輪者也

天尊告道君曰吾開法輪以轉十邪不正道

諸場上品之行夫衆生貪欲萬端無厭自以

身命投於十惡纏骸苦想自役罪狀釁滿天
地形名作道非法妄生淫佚邪氣生無善教
死必有重考億劫委身屠割生死往還長處
盲道終身邪言疾病櫻苦終歸八門吾開法
門普轉還入道真

天尊言法輪開度十邪惡道諸場一品背正
入鬼道終身生邪魅未嬰諸疾苦受報無窮
期二品輕毀道法將入邪徑信順邪言謗道
欺師三品不信道真捨身入鬼魅四品無明
倒見衆生常懷五濁執結魔魅自稱聖名以

亂正道五品常生殺害淫祀鬼魅詐稱神真
貪味甘美種種無端六品因人休否假稱正
神責望天人受取無厭噉食無度七品魔魅
衆生遊行世界或作邪謬鬼語自稱道神伺
人衰厄妄言占相八品衆生觸法邪見一心

字八

十四

背真入偽承事鬼神形像師巫之徒九品淫
亂宗親生邪苦想行不正法十品棄正法往
入魔徑邪道噴噀欺誘天人自稱賢聖放蕩
非法陰私逆順爲人咒誓魘禱國王指天畫
地殺害衆生真偽無別以稱天真夫如斯者

自取十苦八難集因為惡煩惱中生塗炭九
幽執罰無生吾開飛天無量之恩普拔生死
一切罪因同得免脫十邪惡道之根普登十
方長存福天身受威光永超法輪
无上飛天法輪轉十邪惡道上品玉章頌曰

眇眇飛天堂

煥朗曜上清

景王降寶乘

策駕十道場

但見諸邪道

墮墜地獄中

洋銅以灌口

裸身劍樹峯

巨天飛刀割

鐵錐刺心肝

饑餐流火精

負石踐刀山

不見福樂處

唯聞塗炭聲

仰觀十正道

形光負圓明

安坐寶林內

妙相自然生

高上轉法輪

普度諸邪形

開津五道界

超步南陵庭

身詣玉池鍊

寶光身中生

飄飄太虛上

三帀禮真經

天尊告道君曰是玉章鎮於十方飛天雲明

字八

十五

上宮十方丹童玉女各十真保賞靈文常隨

法輪轉運誦其章轉度十邪道諸場以解天

人積滯之苦普入法門者也天人有知其章

者思念存亡之苦齋而誦之苦魂即得超神

十方矣

天尊告道君曰吾開法輪十正道諸場上品
本行之首夫廣幽理顯有是業力但澄真甚
難物色不淳受學者精集因至道玄象者希
合道應真其理微簡可謂自然九萬劫一降
爾議思焉吾開真實轉運法輪劫災不動天
地存焉

天尊言法輪開十正道諸場一品遠惡離邪
道觀行無爲通建福因執心明淨不行陰賊
二品尋真求道信向大經持誠入法通行陰
德三品不邪不僞常行正法一心守道四品

愛念衆生常得安存同八法輪五品慈念萬
物恭敬國王普天隆盛三寶弘化六品修學
上道捨身棄世一無假想滯惑七品起動乘
誠言無假說八品開導天人流暢法音廣宣
道教增廣無量九品萬範同正普弘十方慈
善一切十品法輪闡張普度天人衆生同慶
皆入正道執心剛明者也夫是十正道上品
唯有上德至人能行之矣吾開十方無量法
門普濟無偏一入正道去邪日遠道真无上
與法結緣者焉

无上飛天法輪開十正道上品玉章頌曰

紫虛勃煙 中有玄臺 流明瓊闕 七寶自然

煥朗十方 彌覆諸天 无上法輪 轉度十方

正道明開 元皇符命 飛天至真 浮空稱善

玉帝侍身 左右金童 歷觀諸緣 玄化大運

字八

十六

齊真道前

天尊告道君曰是玉章鎮於无上金真玄宮

十方金童玄女各十真保賞靈文常隨大運

轉十方正道法輪誦其章聲叅十方九天元

皇义手以稱慶无上玉皇稽首作禮即大光

法門以度諸天無極世界萬兆一切衆生悉
得身登十正道福堂皆合道真矣諸天大聖
至真有知其章齋而誦者皆得開度衆生諸
苦亦可保劫不動安固靈根者焉

天尊告道君曰吾開法輪十轉諸場上品無
量至真之本業自非法輪莫能轉焉存真守
道以期斯衆自始劫以來得道者皆入法門
修學上德位極至真未見安豪守貴而望生
天者矣吾觀十方衆生執結甚多財寶雖貴
終不能使人得道聚積珍寶必有餘殃安貧

樂道其實寶真道成之日道主降兆矣身披
九光寶帔七色飛羅之裙頭戴通天寶冠足
著玉文獅子之履項負雙炎天光上蓋流明
寶蓋身登七寶之輦駕乘金龍超越无上道
界鬱鬱羽儀威光芳飭梵行太虛左右天真

字八

十七

手把十絕靈幡諸天各各奉獻自然效樂燒
香散華彌翳十方衆真下降迎兆玉清天寶
受位長存金真當爾之時實自樂焉斯人皆
是安貧守道使得如然世緒華盛不足貪乎
身役十惡財即散焉巨億之財終爲毒門吾

開法輪普告十方飛天至真開度十方無量
世界一切衆生成得成就齋功十轉真人矣
天尊言法輪開十轉至真諸場一品受持誠
者即爲地仙能修行法誠轉位入第二品中
得爲遊仙倍向正心者轉位入第三品中得
爲仙人奉行誠業者轉位入第四品中得爲
飛仙常從經誠不犯衆行者轉位入第五品
中得爲靈仙絕口斷貪味長齋誦經執誠者
轉位入第六品中得爲神仙若能無色貪欲
平等行諸功德捨心抱素者轉位入第七品

中得爲真仙建心廣念十方常行救厄口無
過行濟物無偏者轉位入第八品中得爲飛
天真人守一不動持行萬善敬念法誠常如
對神者轉位入第九品中得爲太上真人恒
能餐霞飲炁苦行修道誦經行香朝真開化

十方普濟無量衆生惠潤天地常無怠倦者
轉位入第十品中得爲无上上清真入者也
夫物自無心耳但能行八誠者以得十方飛
天齊功况於持十誠業本行也但末劫衆生
惟能破誠豈有能修者乎夫人五濁麁行甚

多至人受持以將擬終身之寶鹿人受取以
望世之高位破滅十善之行自以擬長還十
惡之道但夫人自負道非道負人矣未見有
心者求而不得焉

无上金真法輪十轉上品玉章頌曰

字八

六

大園開化

上有寶城

玄虛而治

元一洞明

八方玉樹

七寶羅生

靈風應節

衆音和聲

中有法輪

號曰法王

高上所寶

玉皇高尊

金真妙德

降下飛天

歷觀十方

無量罪因

轉度上品

拔諸苦緣

身免十惡

得入法門

形脫鋒刃 爽得真仙 十轉无上 妙通自然

至真諸場 長存道真

无上金真誠業歷觀十方妙通玉章頌曰

遊觀諸天 中有三羅 鐵網八據 流火飛車

鋒刃楚捷 萬痛交行 頭首分裂 苦哉自傷

一生一死 輪轉惡場 泣涕流血 無復人形

塗炭彌劫 不識命根 命命相對 種種相牽

十善閑靜 蕭條十天 衣廚無為 救諸無緣

金真開法 普放威光 流激天地 照明十方

演誠度人 業力大功 十苦解脫 沐浴金容

通覺本行 三羅豁通 高上轉位 身登寶宮

上朝道主 稽首三週

无上金真誠業本行上品玉章頌曰

雲明鬱秀 流煥十方 金晨映發 蔭藹玉堂

七寶凝結 八會澄靈 玄覆三象 自然靈清

字八

十九

天光朗徹 普照諸形 元始萬行 誠業為宗

把持法輪 弘化諸功 無量本行 萬範因緣

至真通稱 衆法靈根 乘虛躡空 與之通津

元皇上寶 故鎮法輪 三界開道 駕景紫烟

羽蓋垂覆 上謁天尊

天尊告道君曰是三偈玉章鎮於无上大有
玉都无上金真童子萬二千真保賞靈文常
隨劫運轉十方諸天十轉真人上品法輪方
誦其章靈音激響十方無極世界諸天高真
一時設禮无上至真稱善法王告召普開法
門品度萬生皆得道真諸天大聖至真有知
其章齋而誦之者十方天真降下六時朝矣
萬結自散不久道成焉

天尊告道君曰吾開无上金真法輪誠業本
行十二無量上品因緣輪轉妙通至真諸場

斯經上業無所不通普爲法輪灌頂衆淵十
方輪轉開度無量萬生罪惡入諸福場金真
誠行致得長存其道高妙普救無窮飛天上
寶不傳諸仙自然應運其文洞煥無所不通
矣天地運化皆由法輪其功无上自非上德

至人莫能奉焉上聖轉位以成高真悉從其
文萬惡迴善解滯拔苦除罪降福皆由是經
廣濟十方弘教諸天其德大通其道普真運
駕三乘度諸無量吾演是經以付子之奉行
九劫一降飛天玉庭依品開度不以爲難矣

天尊告道君曰吾開无上飛天法輪上品諸
場以擬五濁之劫一品十方無極世界災兵
殺伐濁二品劫運短促日月虧盈濁三品陰
陽逆順星宿失度萬物不生濁四品五方鬼
兵交會殺害天人無量生亡濁五品國政凶

字八

二十

亂天人兵甲煩惱濁者矣子若見此五濁之
世善當依法輪之品開度轉運保固萬品咸
使天地日月星宿各復其位安鎮萬國皆得
存焉

天尊告道君曰吾開无上飛天法輪上品諸

場以擬三災之劫轉度十方無極世界萬生
皆使得免脫劫難故以三乘寶藏以度之矣
一品劫火流行三界同然二品洪水激溢八
極溟合涌波滔天三品暴風彌劫震裂衝天
十方淪沒萬無一遺此是大運應期名曰三
災如是之時子勤用心轉法輪開三乘上品
以度天人之災咸使安存得見太真

天尊告道君曰隱顯六塵觸視玄根魔氣形
色聽者空生雲門晨昏夕翳身心不存物想
最苦招禍神童知者不動彼惡自傷非法所

行偽黠相同萬善一棄終身莫及害一對十
萬劫無生手殺與想同况於伐人命乎金真
上品誠業善當從之矣萬稱之由本行為先
也

天尊告道君曰夫轉法輪開度上品當用金

字八

字一

龍十枚各重一兩以鎮十方紋繒各隨方東
方碧紋九尺南方絳紋三尺西方白紋七尺
北方皂紋五尺四維紫紋各八尺上方青紋
丈二下方黃紋丈四方香案香鑪各十枚
建壇法依三元塗炭禮謝皆法三元拔罪品

三重然燈外壇方各十燈中壇方各八燈上
壇方各九燈皆如法品三寶鎮壇三日三夜
法衆行香誦經發露天謝轉飛天法輪明科
以開度十方萬生罪根滯苦十惡諸場咸使
遷進十方飛天無量福堂矣

天尊告道君曰夫天人修真上道可自依法
修建是法開度十方幽廣生死苦魂并及祖
考諸罪皆得轉度十福堂也若見天地運度
亦當建是大功若見日月虧盈亦當修建是
齋星宿錯度亦當修建是齋諸天國土不寧

亦當修建是齋天下鬼兵興亂萬兆死亡陰
陽不調亦當修建是齋師徒厄急命過之日
亦當修建是齋者也夫是法輪上品齋業無
量大功十方得道莫不從之以得至真諸場
上聖修行是功轉位得爲金真諸天修建是

齋真仙自然開度萬生普弘法門生死因緣
皆由法輪其法高妙无上所寶九劫一轉天
地洞明無量生死齊得福慶光明十方普得
長存夫天人上德至人有知其法受持開化
法門修建是功者道真克成矣

天尊言法輪上品運載十方无上至真妙道
誠業普會無窮玄覺一切無量本行萬範因
緣洞觀天地普入法門業惡行惡沉形九夜
者吾轉法輪咸使得仙衆生反化以生人天
法輪運道九萬劫一傳自非高上玉皇之儔

字八

二十二

莫能降真吾今相告封著中宮諦受奉行須
擬劫災依法上品轉度諸天十方無極世界
一切萬生同得法緣普見大光開運覺觀道
真其功廣明弘道三乘衆法之母至真之尊
普爲十方之光景是爲天地萬道之宗其福

无上湛然長存大劫方降普見道真普度衆
生皆登十方常住福天爾受法王上位勤當
用心於是道君即起叉手作禮奉受金真法
輪誠業本行上品事竟元一天尊勅諸大聖
衆策駕而去諸天復位億劫長存

道言吾受无上金真法輪誠業本行長存上
品無量因緣自從洞明劫始已來開運度十
方無極世界無量恒沙衆生生死苦魂迴化
十惡拔諸罪根解羅出滯煩惱諸場咸得同
詣玉池鍊形冠帶寶服光明十住福堂其功

隨運而轉自非玄覺莫能降焉其文舊典萬
道勢訖其道方行晨暉八會當是其時雲明
下降以保劫災若有福德之國先得道真者
矣

字

三

太上洞玄靈寶誡業本行上品妙經



